

四庫全書

史部

欽定四庫全書

史部

辛魯盛典 御製序

卷一至
四

詳校官宗人府府丞實光鼎

編修臣程嘉謨覆勘

總校官進士臣繆璘

校對官助教臣胡子襄

膳錄監生臣張丹寬

膳錄監生臣張曾詣

欽定四庫全書

史部十三

幸魯盛典

政書類二 儀制之屬

提要

臣等謹案

幸魯盛典四十卷

國朝襲封衍聖公孔毓圻等撰進先是康熙二

十三年

聖祖仁皇帝臨幸闕里

親祀

孔廟行九拜之禮

特命留曲柄繖於廟庭復

親製碑文遣官勒石於

孔廟大成門左周公孟子諸廟咸蒙

製文刊石並錄聖賢後裔給世官以奉祠祀鉅典裔

皇薄海忻舞毓圻以

聖天子尊師隆軌超邁古今宜勒為成書垂示來葉

二十四年疏請纂修并舉進士金居敬等八
人司其事得

旨俞允至二十七年成書十八卷奏進蒙

指示應改正者二十八條及臣工詩文尚有應遴選

錄入者

諭毓圻等覆加校定會

詔發帑金重建

廟庭

御製奎章摹鑄樂石尊崇之典視昔彌加毓圻等乃
續事編摩增輯完備凡修成事迹二十卷藝
文二十卷刊刻表

進即此本也洪惟我

聖祖仁皇帝統接羲軒心源洙泗褒崇

聖教典禮優隆為亘古所未有非區區管闕蠡
測所可形容然文物典章毓圻等得諸見聞
頗能臚具伏讀是編

大聖人崇儒重道之至意猶可想見其萬一是固宜
藏諸金匱以昭示無極者矣乾隆四十三年

十月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

御製幸魯盛典序

朕惟自古帝王聲教翔洽風俗茂美莫不由於崇儒重道典學右文用能發詩書之潤澤宣道德之閭奧推厥淵源皆本洙泗以故追崇之典歷代相仍或躬詣闕里脩謁奠之儀潔志肅容盡誠備物其間禮數隨世損益至於希風服教百代式型異世同揆莫之或二猗歟盛矣朕臨御以來垂三十載溯危微之統緒念生安之聖

哲恒慮涼薄未克祇承用是夙夜亶心孜孜不倦惟我
至聖先師孔子配天地參陰陽模範百王師表萬禩朕
每研搜至道涵泳六經覺憲章祖述剛定贊脩之功日
星揭而江河流私心嚮往竊有願學之志焉乃者東巡
踰泰岱涉泗沂遂過闕里親行釋奠得瞻廟貌仰聖容
以為德盛功隆欽崇宜極凡厥典禮有加前代又親製
文辭手寫以樹之貞石務用導揚至教風示來茲夫緬
懷曩哲繼躅前賢猶思覩其物采接其居處况先師遺

風餘烈久而彌新重以朕之寤寐羹牆優乎如見及過
杏壇相圃之間山川儼然檜楫如故彷彿金石絃誦之
聲聞於千載而上流連往復不能自己也衍聖公孔毓
圻上疏陳謝且以禮儀隆重非直一家榮遇請脩幸魯
盛典一書朕既可其奏久之書成復請敘言以冠其端
朕萬幾餘晷敦勉弗遑實欲默契先師尊聞行知於以
阜物誠民風同道一庶幾躋世運於唐虞登治術於三
古是書也豈徒使天下後世知朕於先師欽慕無已如

此且愈以見聖人之道覆幬羣倫苞毓萬象即凡車服
禮器之遺皆足令人感發而興起也故賜之序

康熙二十八年四月初二日

幸魯盛典進表

孔子陸拾柒代孫太子少師襲封衍聖公臣孔毓圻
恭承

敕旨編刻

幸魯盛典今已成書奉

表上

進者臣毓圻誠惶誠恐稽首頓首

上言伏以

帝德崇儒特舉隆文於闕里

皇仁重道首頒異數乎尼山開局

命官褒洙泗希逢之典超前軼後成古今未有之書宮

墻尊萬世之

師禮制立百王之法敬陳歲事上冒

宸嚴欽惟

皇帝陛下

聖神廣運

天地同流

履中蹈和體博厚高明之蘊

祖堯述舜接危微精一之傳久道化成大猷光被
一人有慶四海同風猶乃崇禮

先師褒揚

聖學值上元之甲子日轉一陽

幸東魯之廟庭星聯五曜四方觀化夾道而瞻

六飛

萬乘詘尊升堂而行九拜獻爵奏太常之樂純乎玉振

金聲迎神讀祝版之辭詎數歌風乾雅

皇心致懋降輦輅而奠林垆

天語如春望羹墻而瞻象設徘徊車服留

御蓋于廟堂想像金絲題

奎章于門額援珠毫而作賦檜樹向榮濡玉硯而製詩

杏壇增色架穹碑于霄漢石採西山鐫

睿藻于樞星文從北極至若

召諸生于講幄經義昭明

授博士于翰林

聖慈優渥

錫禮樂詩書之額蓬藿焜煌

題松筠節壽之坊鳳鸞飛舞恢宏林地則十一頃有

奇優恤子孫則千萬年無算

許守墳之百戶亦隸夏官合在籍之四司皆霑

朝命

賜書

賜服不但臣家

蠲稅蠲糧遍於通邑及

念殿寢之隳敝更發

內府之金錢堂廡煥然仍宗廟百官之富碑亭屹若
頌庖羲一畫之文大工既成鴻儀肇舉

特命

皇子昭告鼎新裸獻加虔獲人豫神歡之慶始終卒

度昭禮明樂備之休載勒貞珉復蒙

宸翰對峙之奎文閣後如日東而月西屹立於大成門
前並天長而地久崇師褒聖過分逾涯櫟槍掃
而告成工瀚海清而修祭典乃至賢如述聖代
鮮專祠鯨棟虹梁

賜堂基而崇祀春嘗秋禴

允締造以陳祠且使孟廟重新姬祠復葺齊頌

御製並建豐碑仲由閔損之門俱沐旌賢之

典東野端木之胄咸霑尚德之

恩下至濂洛後昆闕遠裔莫不身膺

命服名歷清班昔漢高之祀太牢唐皇之經東魯迨

至宋室復遇真宗親製贊辭勅留祭器莫不傳

為盛事加以特書然而典禮未全儀文弗備未

有隆規咸五曠典登三如

今日者也蓋惟同心同理

道大而德隆故兼作君作師

禮優而澤洽雖千載自炳於

起居之注而一時不可無紀盛之書伏蒙

聖恩准

臣

額請就廟開哀輯之局拜疏薦纂修之員首

炳

宸章臚陳

典制

皇仁臨幸之

俞旨羣工奏對之昌言扈從入廟之班聯臣族受

恩之始末一一恭紀事事詳編加以臣僚應

制之作卿士頌

聖之詞亦奉

綸言增諸末簡

臣

謹同纂修諸臣緝成正文二十卷詩

文二十卷名為

幸魯盛典實則集聖大成恭荷

御筆製序并蒙

欽定批簽一經筆削于

九重彌增光焰于萬丈則又詞苑未叨之異數書局希
構之

洪慈也竊按

聖門紀載之書多存歷代經籍之志盈箱累篋唯傳
泗水之遺文紀事考言未入朝家之大典孰若

熙朝之盛事聿垂萬代之章程永同帝典王謨並垂千

古將與魯論家語齊炳九垓臣謹裝潢成帙齋沐

恭進臣性資弇鄙問學空疎守祀祖庭率履恐貽

隕越祇承

休命編摩未敢怠
遑雖復瞑寫晨書不無挂
一漏萬藉

一蠡以測海豈能揚扆

鴻猷握寸管以窺天何足鋪陳

盛烈伏願

顯仁藏用

富有日新

道造逢源之深

德躋極天之峻

文明大啟無庸渭水求師

正學丕昌不向峒山問道則彌綸無外歷久遠而愈

光法制昭垂綿繼承而勿替臣無任瞻

天仰

聖激切屏營之至謹

表隨

進以

聞奉

旨覽卿奏幸魯盛典編輯有年茲刊刻告成裝潢來進
知道了該部知道書留覽

康熙五年三月

日孔子陸拾柒代孫太子少師襲封衍聖公臣孔毓圻謹上表

辛魯盛典職名

總裁官

太子少師襲封衍聖公臣孔毓圻

副總裁官

翰林院五經博士加五級臣孔毓埏

纂修官

乙丑科進士授山西大同府靈邱縣知縣臣金居敬

江南長洲縣人

乙丑科進士授直隸大名府元城縣知縣臣俞兆曾

浙江海鹽縣人

勅封翰林院編修丁巳科舉人候補內閣中書舍人

臣

叢克敬

江南江寧縣人

戊午科舉人戊辰科進士授翰林院庶吉士

臣

孫致彌

江南嘉定縣人

辛酉

科副

榜

貢

生

臣

葉

湜

江南崑山縣人

候選小京職陞貴州都勻府知府

臣

沙汝洛

山東萊陽縣人

候

選

知

縣

臣

章

緯

浙江富陽縣人

增

廣

生

員

臣

曹

晃

浙江嘉善縣人

校閱官

候

選

知

縣

臣

張拱樞

浙江錢塘縣人

候

選

州

同

臣

張元煒

江南婁縣人

收掌官

四

氏

學

學

錄

臣

孔尚侃

山東曲阜縣人

候選典簿授光祿寺典簿

臣

程士璉

江南丹徒縣人

膳錄官

候

選

州

同

臣

許

永

江南常熟縣人

候選州同授刑部主事河工効勞

臣

程兆彪

江南上海縣人

候

選

州

同

臣

吳道行

江南婁縣人

侯

選

縣

丞

臣

張廷玟

浙江錢塘縣人

四

氏

學

教

授

臣

沙

潢

山東蓬萊縣人

貢

生

今

考

授

通

判

臣

孔衍溥

山東曲阜縣人

監

生

今

考

授

州

同

臣

馮

暹

浙江仁和县人

幸魯盛典凡例

恭惟

聖天子致治太平舉時巡之曠典望秩岱宗觀風吳會
清蹕南還

寵臨闕里禮隆樂備

恩覃澤洽仰見

皇上同揆接統尊師重道非前代帝王所可幾及書之
方策事體重大臣等未敢輕易屬藁謹先定凡

全宋文卷之三
凡例
例如左

御製詩文為經作則如日星雲漢昭回在上如天球河
圖永為傳寶惟有仰瞻珍襲莫能贊歎頌揚獨
標卷首炳然萬古 一則

典禮崇隆

恩澤優渥節目繁多年月相間是書仿記事本末之體
事為起訖各自編年底可一覽瞭然仍以大書
為綱而章奏檔案細書為目焉 二則

是書惟志

幸魯而事有原始義有連及例當備書昔杜預謂左氏傳或先經以起事或後經以終義敢竊取之以為準的首紀

巡幸次及

臨幸廟林典禮次及

加恩聖裔

推恩五氏子孫次及

遣祭元聖

推恩後裔次及開擴林地議通璧水次及

賜碑次及修廟次及

皇子告祭次及再

賜修廟碑文次及

推恩先賢先儒子孫而終之以纂修事宜至於臣僚

頌言皆以送到職銜為序其地方職官及臣等

詩文附於末卷

三則

法駕省方敷天袞對實惟臣里倍極光榮億萬斯年流
徽載籍粵自前世元后幸臨正史特標綱要乃
其恩施曲被散見於祖庭廣記孔門僉載等書
討論故事莫有盛於

今日採摭附錄以類相從正如繁星之麗天百川之

歸海云爾

四則

皇上聖德神功登三咸五峻極於天名言莫罄臣等綴
以案語附於本條予以志感激

恩施欣戴遭遇雖復殫思竭慮無能擬諸其形容顧惟
蠡測管窺抑亦畧陳其考質踴躍鳬藻不知所

裁 五則

臣僚恭遇

盛典朝野洋溢頌聲或身親

扈從或出入

禁近喜起賡載述作斐然 臣與纂修諸 臣亦不敢以淺

陋自解各攄悃愫哀集衆體彙為一編 六則

襲封衍聖公臣孔毓圻恭紀

欽定四庫全書

幸魯盛典卷一

御製

至聖先師孔子廟碑

朕惟道原於天弘之者聖自庖犧氏觀圖畫象闡乾坤
之秘堯舜理析危微厥中允執禹親受其傳湯與文武
周公遞承其統靡不奉若天道建極綏猷亶乎尚矣孔
子生周之季韋布以老非若伏羲堯舜之聖焉而帝禹

湯文武之聖焉而王周公之聖焉而相也歸然以師道
作則與及門賢喆紹明絕業教思所及陶成萬世是伏
羲堯舜禹湯文武周公之統惟孔子繼續而光大之矣
間嘗誦習詩書之所刪述大易之所演繫春秋之所筆
削禮樂之所修明本末一貫根柢萬有殆與覆載合其
德日月竝其明四時寒暑協其序焉故曰仲尼之道一
天道也朕敬法至聖景仰宮牆嚮往之誠弗釋寤寐歲
甲子十有一月時邁東魯躬詣曲阜展修祀事復謁聖

墓循撫松枯儀型在望優乎至德之親人也朕忝作君
啟牖下民深惟夫子師道所建百王治理備焉舍是而
圖邳隆曷所依據哉因勒文於石彰朕尊崇聖教以承
天治民之意系以辭曰

遐哉三五維辟之式於皇尼山師道允植天畀木鐸覺
彼羣生百行以正六籍以明賢邁唐虞聖則河洛綏和
動來文博禮約性天峻極倫教孔彰學昌洙泗統歸素
王炎漢崇儒少牢用饗厥後賢君高山是仰予懷至聖

泣彼東方音徽云邈道德彌光鬱鬱瑩林莪我祠殿企
慕安窮羹牆如見泰岱匪高東海匪深敬揚懿軌終古
式欽

至聖先師孔子贊

并序

盖自三才建而天地不居其功一中傳而聖人代宣其
蘊有行道之聖得位以綏猷有明道之聖立言以垂憲
此正學所以常明人心所以不泯也粵稽往緒仰邇前
徽堯舜禹湯文武達而在上兼君師之寄行道之聖人

也孔子不得位窮而在下秉刪述之權明道之聖人也
行道者勲業炳於一朝明道者教思周於百世堯舜文
武之後不有孔子則學術紛淆仁義湮塞斯道之失傳
也久矣後之人而欲探二帝三王之心法以為治國平
天下之準其奚所取衷焉然則孔子之為萬古一人也
審矣朕巡省東國謁祀闕里景企滋深敬搗筆而為之
贊曰

清濁有氣剛柔有質聖人參之人極以立行著習察舍

道莫由惟皇建極惟后綏猷作君作師垂統萬古曰惟
堯舜禹湯文武五百餘歲至聖挺生聲金振玉集厥大
成序書剛詩定禮正樂既窮象繫亦嚴筆削上紹往緒
下示來型道不終晦秩然大經百家紛紜殊途異趣日
月無踰羹牆可晤孔子之道惟中與庸此心此理千聖
所同孔子之德仁義中正秉彝之好根本天性庶幾夙
夜勗哉令圖溯源洙泗景躅唐虞載歷庭除式觀禮器
摘毫仰贊心焉遐企百世而上以聖為歸百世而下以

聖為師非師夫子惟師於道統天御世惟道為寶泰山
巖巖東海泱泱牆高萬仞夫子之堂孰窺其藩孰窺其
徑道不遠人克念作聖

祭至聖先師孔子文

仰惟先師德侔元化聖集大成開萬世之文明樹百王
之儀範永言光烈罔不欽崇朕丕御鴻圖緬懷至道憲
章往哲矩矱前模夕惕朝乾覃精思於六籍居今稽古
期雅化於萬方繫惟典訓之功實覩乂安之效茲者巡

省方國至於岱宗瞻望魯邦爰來闕里空堂至止恍聞
絲竹之聲舊寢徘徊喜動宮牆之色車服禮器宛然三
代遺風几杖冊書竄矣千秋盛蹟愜明靈之儼在文治
遐昌肅禋祀以惟虔精忱庶格

重修闕里孔子廟碑

朕惟大道昭垂堯舜啟中天之盛禹湯文武紹徽危精
一之傳治功以成道法斯著至孔子雖不得位而贊修
刪定闡精義於六經祖述憲章會衆理於一貫為往聖

繼絕學為萬世正人心使堯舜禹湯文武之道燦然丕
著於宇宙與天地無終極焉誠哉先賢所稱自生民以
來未有盛於孔子者也往歲甲子朕巡省東方躬詣闕
里登聖人之堂祇將祀事觀其車服禮器金石絃歌蓋
徘徊久之不能去焉顧聖廟多厯年所丹雘改色榱桷
漸欹用是惄然於心特發內帑專官往董其役鳩工庀
材重加葺治經始於辛未之夏事竣於壬申之秋廟貌
一新觀瞻以肅蓋深惟孔子之道垂範今古朕願學之

志時切於懷每考天人性道之原修齊治平之要思以
遠紹前緒牖迪生民凡所以尊崇褒顯者靡不隆禮竭
誠以將景行仰止至意而况廟庭之地尤為聖人神明
所憑依者哉今者登堂而陳俎豆入室而習禮儀營構
既堅采章彌煥庶幾於朕心深有慰焉用是特遣皇子
脩祉敬展禋祀以告落成凡我臣民瞻仰宮牆倍增嚴
翼尚益思敦崇德義砥礪倫常以不負朕尊師重道之
意豈不休歟因勒貞石系以辭曰

麟書啟瑞素王挺生上律下襲玉振金聲範圍百代陶
甄萬類道備中和德參天地立型垂訓師道昭宣象懸
七曜海納百川曩巡東魯臨河登岱峩峩尼山羹牆斯
在虔恭展謁至德是欽宗風溥博教澤閎深洙泗之陽
殿寢奕奕上棟下宇神靈安宅冬官特飭締造維新宏
規大啓肅奉明禋聖人之居永以觀德千載傳心四方
式則

祭啟聖公文

維公系本神靈生稱瓌偉勇力聞於魯國皆道德所發
皇政事紀於鄆邦悉文章所宣著篤生聖子代為帝師
寰宇崇歲祀之儀不先父食古今奉斯文之統共指家
傳茲值東巡特臨曲邑溯二十年之教澤孰非厚德燕
貽垂七十世之孫謀如見神明陟降用修彝祭之典代
以扈從之臣泗水環流知發源之有自防山聳峙占積
慶之無疆牲醴式陳尚其歆格

闕里古檜賦

孔子手植檜在杏壇之側金貞祐間無復存矣元至
元三十年再茁故處明弘治間又燬於火今所遺者
不枯不榮屹立霜露而秀色獨異撫摩久之乃作賦

曰

維槎枿之靈質實鈞化之所鍾標扶輿之奇特峙先聖
之故宮涵元氣以不朽與至道而俱崇爾其黛幹蒼蒼
孤柯濯濯鶴骨初扶霜鱗未作儼茁軋以方舒類鴻荒
之忽鑿謝緡采於春華完淳風於太樸夭矯拂勃星臨

露滴枝無取於樛樛葉全稀於撼撼夕飈度兮弗驚朝
旭烘兮如滌伊間氣之潛滋惟神爽之咸集徘徊延却
宛轉斷連蟠屈兮若侑羽之在列聳削兮若箕簾之待
懸則有築以崇封沃以膏壤方以周闢角以文磔足縮
心獻目給神賞蘿煙奪翠松籟失響於是楷因之而擢
穎著感之而抽莖爭歲蕤於絃誦之里齊扶疎於禮樂
之庭朝菌慚兮一旦大椿讓兮千齡上泝真宰之功遠
契無為之代均雲行兮雨施等乾始兮坤載疇則出混

茫之中而居耳目之外與三才以竝植綿歷禩其長在
亦有扶桑海表若木山巔東瀛西極揭日摩天迹雖誇
於神異植非出於文宣宜瞠乎其後矣邈無得而稱焉

孟子廟碑

自王迹熄於春秋聖人之道或幾於泯滅卒之晦而復
明歷千百世而不敝者恃有孔子也孔子沒百有餘年
浸假及於戰國楊墨塞路禍尤烈於曩時子輿氏起而
闢之於是天下之人始知誦法孔子率由仁義斯道之

有傳至於今賴之是以後世學者如韓愈蘇軾之徒咸推其功以配大禹而閩洛之儒咸尊為正學之宗傳烏虜盛已夫洪水之禍止於人身已爾楊墨之禍隱然直中於人心不有孟子使楊墨濫觴於前釋老推波於後後之人雖欲從千載之下探尼山之遺緒其孰從而求之因推述厥義刻文於石俾揭於鄒之廟其文曰

尼聖既往負矣音徽後百餘歲聖緒浸微尚異實繁楊墨競煽陷溺之禍酷於昏墊惟子興氏距詖放淫以承

先聖以正人心述舜稱堯私淑孔子正學修明百世以俟不有是者斯道孰傳宇宙晦霧萬物狂悖我讀其書曰仁曰義遺澤未湮聞風可企嶽嶽亞聖巖巖泰山功邁禹稷德參孔顏刻石茲文於祠之下誦烈揚休用告來者

泉林記

朕被服至道誦法孔子於詩書簡冊之中羹牆載見如聞其言論而接其聲容者匪伊朝夕矣嘗以不得一登

闕里之堂觀其車服禮器山川風物慨然至聖之音徽
每低徊於中而不能自己迺者在廷之臣咸謂古者天
子巡省方岳觀察民俗朕俞其請因念岱宗在望于邁
魯郊夙昔所懷今茲可慰歲之冬月興衛北還抵於泗
水東境距其縣治五十里陪尾山之陽衆泉出焉石竇
崕岿清流蕩潏下合沂泗遠波悠然相傳為子在川上
處云旁有古寺厥名泉林坡陲幽曠樹木茂密雖古今
異時陵谷不改去聖人之居如此其近意者當日杖履

所經周覽原泉默契道體喟然發水哉之歎者其即斯地耶於是停驂弭節瞻眺久之恍乎如有所得殆移晷而後去也夫天地無終窮流水之出於天地者亦無終窮聖人之道川流敦化萬古不息與天地流水同其無終窮焉其何能已於予懷耶孔子繫易其言天也曰行健言地也曰無疆孟子之言水也曰盈科而後進君子之於聖人之道也溯源窮流學水至海亦若是焉而已矣朕既幸宮牆親覲至止非遙而又喜泉源勝地聖跡

所存而得游歷其處也遂為之記

祭元聖周公文

惟公丕承聖緒懋敘人倫光烈覲揚成一家之繼述官
禮制作垂萬世之經常道闡圖書探六爻而易貢心傳
精一兼三代以訏謨啟東魯之典型猶存故澤入尼山
之夢寐未墜斯文朕稽古省方瞻言至止郊原縱目遙
深松栢之思廟貌崇觀爰切羹牆之慕特申祇薦代以
親藩惟冀神靈尚克歆饗

周公廟碑

世運代嬗隔越千載則必有神哲挺生其間以承大統
以作名世惟公體上聖之質紹祖考之德孝友篤仁左
右寧王厥勲爛矣及乎負宸能以勤勞寅恭惇大忠信
之道翼贊其君太和洽而頌聲作焉夫功莫大於致治
綏邦業莫隆於制禮作樂公身兼數器開物成務其龐
鴻炳燦之烈既已載於詩書志諸史冊至於繫文辭定
官禮撰爾雅出言為經又何博奧難窮也昔孟子論列

古帝王至於公曰兼三王施四事而韓愈亦歷數堯舜禹湯文武以至公蓋道統之傳如此豈僅以治理之彰彰者與遙想風徽官公遺嗣俾昭世澤於無窮既命有司新公廟貌希慕之餘勒石頌德而繫之以詩詩曰

邃古民樸混混茫茫列聖經綸肇軒迄商敘厥倫紀賁以采章公監二代揆時立制有因有除禮明樂備體國經野成理萬彙集武之勲紹文以孝代成誠民竝孔立教為子為臣是則是倣宗邦綿歷忠厚所貽貞珉載鐫

作頌致思鳧繹同時億禩為期

聖廟落成遣皇子祭告文

朕惟道統與治統相維作君與作師竝重先師孔子德
由天縱學集大成綜千聖之心傳為萬世之師表故廟
祀久遠垂於無窮朕御寓以來立綱陳紀彰教敷治咸
奉至聖為法程凡典禮追崇竭誠致敬自京師下逮郡
邑辟雖泮水建廟釋奠罔不修舉况茲闕里乃聖人鍾
毓之鄉車服禮器於斯藏守曩者東巡展拜之餘仰觀

廟貌多歷年所漸有頽敝深廬於衷用是命官董理重
加修葺棟宇維新以妥聖靈茲當告成特遣皇子肩社
致祭俎豆肅陳恍乎接至聖之音容以將朕儼恪欽崇
至意陟降在茲尚祈歆饗

克捷告祭闕里廟文

朕服膺聖訓殫究遺文凡茲六籍所垂惟以安民為要
臨御以來孜孜圖治綏乂蒸生遠邇中外視同一體乃
有厄魯特噶爾丹荒陬狡寇肆虐跳梁擾毒邊方稔惡

已極朕親統六師三臨絕塞弘彰撻伐克奏膚功逆孽
就俘亮渠殄滅遐荒番部罔不歸誠自茲永靖邊塵咸
安生業惟是至聖先師默相啟佑特遣專官敬申裡祀
祇告成功伏惟昭鑒尚饗

顏子贊

聖道蚤聞天資獨粹約禮博文不遷不貳一善服膺萬
德來萃能化而齊其樂一致禮樂四代治法兼備用行
舍藏王佐之器

曾子贊

洙泗之傳魯以得之一貫曰唯聖學在茲明德新民止
善為期格致誠正均平以推至德要道百行所基纂承
統緒脩明訓辭

子思子贊

於穆天命道之大原靜養動察庸德庸言以育萬物以
贊乾坤九經三重大法是存篤恭慎獨成德之門卷之
藏密擴之無垠

孟子贊

哲人既萎楊墨昌熾子輿闢之曰仁曰義性善獨聞知
言養氣道稱堯舜學屏功利煌煌七篇竝垂六藝孔學
攸傳禹功作配

過闕里

鑾輅來東魯先登夫子堂兩楹陳俎豆萬仞見宮牆道
統唐虞接儒風洙泗長入門撫松柏瞻拜肅冠裳

闕里古檜

幹聳朱甍外根蟠碧殿阿奇文成左紐元氣挺孤柯瑞
與龜龍竝傳來歲月多徘徊看手澤不共劫灰磨

幸魯盛典卷一

欽定四庫全書

幸魯盛典卷二

康熙二十三年甲子春二月翰林院編修曹禾
吏科掌印給事中王承祖各疏請

皇上東巡

命廷臣集議

翰林院編修曹禾

題為恭請

皇上登封岱宗以告成功以昭盛德事臣聞祀典國之
大事帝王事天明事地察於是乎神祇降福人
民悅豫慶流久遠古者有常祀有特祀禮曰天
子祭天地四方山川五祀歲徧焉此常祀也四
時舉行之禮也書曰歲二月東巡狩至于岱宗
柴望秩于山川此特祀禮司馬遷所謂每世之
隆則封禪答焉者也三五以來昭姓考瑞必以
其成功告於上帝臣考封禪書及班固應劭服

虔諸儒所言泰山五嶽之長神靈所聚因高崇
天謂之封就廣增地謂之禪明受天地之所命
功成事遂有益於天地若高者加高厚者加厚
陰陽和萬物序刻石紀號高世比德於九皇甚
盛典也逮秦漢唐宋之主有事岱宗者皆勒兵
十數萬創立宮殿更起明堂辟雍勞民費財失
對越之意後世議者遂不敢申明其禮獨詳於
一歲中祈年報賽之常祀不知事天一也而禮

有大小帝王受命於天，左右相之，默成其功業。故因名山，升中與天相見，報受命之無負。因之燔柴肆祀，以答幽贊。明欲其精神通於真宰，使神祇各率其職，佑我皇極。光我泰階，天人之際，感召甚微，其為典禮至尊至重，洪惟我

太祖高皇帝誕膺圖籙

太宗文皇帝受寶握符

世祖章皇帝撫有區夏，大命雖定，而天下未寧，人心未靖。

三孽伏於方鎮海寇跳梁東南此乃

上帝神靈眷顧篤佑

皇上留遺艱難昭宣至德神功開大一統之業垂裕於
萬世也伏見

皇上睿謀獨運動與天契決機制勝掃蕩都盡臺灣通
寇讐威歸化納土稽顙窮海萬里廓清無外

皇上聖德高深期臻上理雖六合同風而孜孜不已政
化翔洽流於無垠三光五行昭精布序年穀順

成聲教四訖閭閻安生樂業共見太平而奉琛
職貢梯山航海而來者不可勝數猗歟盛哉古
帝有功德者莫過於黃帝黃帝上元甲子貞元
運會考定星歷建天地神祇物類之官制作度
數合符造化由是封禪勒成遂開宇宙文明之
象漢武帝不得其時則以十一月甲子朔冬至
應之而數千年之景運適協於今日功成治定
之後則統天之紀應地之時而立人之極端在

今日矣臣愚竊謂

皇上以精一執中為奉若豈樂於泥金刻石鋪張揚厲
之文然而

上帝之命不可不報山川百神之助不可不答而運世之
本開基之功德不可不紀誠宜稽古禮文潤色
鴻業勿憚登陟之勞亟議告成之典考漢唐之
儀注行之簡易順承大慶維新庶政為生民錫
福為奕葉儲庥光昭

祖

宗之洪烈休德將見瑞應沍臻頌聲洋溢與黃帝之時同
其盛美矣臣於歲首即懷此念慮蹈越位之罪
既而惟之受

恩深重報稱無由而敷陳經史導揚德化臣之職也拳
拳之誠冒瀆

宸聽奉

旨九卿詹事科道會議具奏

吏科掌印給事中王承祖

題為請倣古帝之巡狩以勤民事以光

聖治事臣仰見我

皇上乘泰運之始出維新之治屢頒

上諭戒飭臣工疏通仕路皆

軫念民生期登熙隆至意也誠德嫺堯舜功邁漢唐矣

方今四海昇平要荒向化正觀風問俗勸課農

桑之時臣讀舜典所載歲二月東巡狩至于岱

宗柴望秩于山川肆覲東后臣竊惟其意岱宗
居五嶽之首東方為生氣之先二月乃東作之
始燔柴祀天因所至而祭告之至其協時月正
日同律度量衡蓋皆為民事也故載之於書令
後世倣其意而行之我

皇上念切民瘼求登殷阜必以農功為先務請倣虞帝
之制巡幸東方察閭閻之利病問風俗之厚薄
設祭方嶽以祈年豐又聞泰山出雲不崇朝而

兩天下是

聖帝一禱即澤沛萬方矣詩云以祈甘雨以介我稷黍
以穀我士女此之謂也且東嶽密邇孔里臣見
史冊所載漢高至魯以太牢祀孔子後世美其
開一代之文治倘

御輦所屆觀其車服禮器亦古今鉅觀而

皇上右文至意載之史冊誠千古不易見之盛事臣讀

史記封禪書內云上古封禪者七十二君皆荒

唐無稽至秦皇漢武倣而行之不過耀德張功
後世鄙焉我

皇上德接精一之傳博稽羣書上法虞帝行燔柴之禮
不襲封禪之事是

聖德神功光昭萬世矣奉

旨九卿詹事科道一併會議具奏

禮部為恭請

皇上登封岱宗以告成功以昭盛德事臣等會議得翰

林院編修曹禾疏請三五以來昭姓考瑞無不
以其成功告於上帝逮秦漢唐宋之主有事岱
宗者類皆創立宮殿更起明堂辟雍勞民費財
失對越之意後世議者遂不敢申明其禮洪惟
我

皇上睿謀獨運動與天契決機制勝掃蕩都盡

上帝之命不可不報山川百神之助不可不答運世之本
開基之功德不可不紀宜亟議告成之典等語

又科臣王承祖疏稱巡幸東方察閭閻之利病
問風俗之厚薄設祭方嶽以祈年豐又聞泰山
出雲不崇朝而雨天下

聖帝一禱即澤沛萬方矣且東嶽密邇孔里臣見史冊
所載漢高至魯以太牢祀孔子後世美其開一
代之文治倘

御輦所屆觀其車服禮器亦古今鉅觀而

皇上右文之至意載之史冊誠千古不易見之盛事臣

讀史記封禪書內云上古封禪者七十二君皆
荒唐無稽至秦皇漢武倣而行之不過耀德張
功後世鄙焉我

皇上德接精一之傳博稽羣書上法虞帝行燔柴之禮
不襲封禪之事是

聖德神功光昭萬世等語伏察封禪之說不著於經書
傳言舜至岱宗燔柴以祀天原非封禪唐虞三
代以前實無登封故事科臣王承祖疏稱封禪

卷二
之禮後世鄙焉編修曹禾請封禪以告成功之
處無庸議又王承祖疏稱請倣虞舜巡幸東方
察閭閻之利病問風俗之厚薄設祭方嶽以祈
年豐漢高至魯以太牢祀孔子後世美其開一
代之文治恭惟我

皇上博綜經學弘闡心傳重道崇文千古莫竝且
軫念民依省方問俗

鑾輿所至

訓飭官方特加蠲賑此皆勤民重農至意如

皇上巡問民俗經過泰山關里應倣行虞舜燔柴漢高

祖祀孔子禮致祭等因奉

旨着候旨行應行典禮該部即詳察具奏欽此欽遵

臣

等查虞書舜典載歲二月東巡狩至于岱宗柴

望秩于山川肆覲東后禮記王制所載與虞書

同俱無燔柴致祭禮儀唐開元禮載有修壇設

位奠玉帛進饌賜胙等儀明會典內載永樂六

卷二
年至北京經過處所遣官祭陵祭淮祭泰山闕
里嘉靖十八年南巡所過嶽瀆山川有望祭及
遣官致祭禮亦未詳載禮儀伏查見行典禮冬
至大祀

天於圜丘燔柴作樂奠玉帛進俎行三獻禮飲福受胙撤
饌望燎俱有定儀又查史鑑紀漢高祖十二年
自淮南還過魯以太牢祀孔子未載致祭禮儀
明帝至魯詣孔子宅御講堂章帝祀孔子於闕

里及七十二弟子作六代之樂大會孔氏男子
二十以上者六十三人命儒者講論語安帝祀
闕里孔氏親屬諸生悉會賜帛有差北魏孝文
帝唐高宗明皇皆親祀孔子後周太祖謁孔子
廟又拜孔子墓俱未載有禮儀宋真宗備禮謁
文宣王廟孔氏宗屬竝陪位帝再拜行酌獻禮
又幸叔梁紇堂命官分奠七十二弟子先儒洎
叔梁紇顏氏親製贊刻石廟中復詣孔林以樹

擁道降輿乘馬至丈宣王墓設奠再拜脩飾祠
宇給便近十戶奉瑩廟命宰相等撰顏子以下
贊留親奠祭器於廟中從官立石刻名賜孔氏
錢帛錄親屬五人竝賜出身又賜太宗御製御
書一百五十卷銀器八百兩伏查順治九年

世祖章皇帝行幸學禮康熙八年

皇上行幸學禮釋奠講書傳

制加

恩俱有定儀在案臣等欽惟

皇上敬

天勤民勵精宵旰凡

鑾輿巡歷所至之地輒諮詢吏治延訪輿情

軫念甄黎加

恩部屋此即帝舜省方觀后考績問俗之至意也

車駕行經泰岱燔柴之禮自應詳備伏稽虞書傳註未

經載有儀節無從考據其後世登岱祀天多因

封禪費繁儀縟一無可採今應照見行

圜丘大祀禮參酌舉行擇祭所於泰山不必築壇設

牌位及

配位應設幄具品物祭日燔柴作樂奠玉帛進俎讀祝行

三獻禮飲福受胙等儀俱如

圜丘禮文武從官及

朝見官員俱照例按品陪祀其泰山之神應照祭五

嶽禮

遣官致祭至於闕里親祀孔子自漢高祖以下見於史冊者凡九帝我

皇上天縱徇齊懋勤典學窮六經之奧義弘百代之心傳以及廣厲師儒振興文教允矣垂休奕禩度越百王已茲

車駕經過闕里特行

親祭尤為盛事伏考前代禮儀俱未詳備今應照康熙八年

幸學釋奠禮參酌舉行祭日用太牢作樂奠帛獻爵等儀俱如釋奠禮其啟聖祠四配十哲兩廡亦照

例

遣官分獻文武從官及

朝見官員俱按品陪祀孔氏及五氏宗屬應陪祀者亦照例陪祀其樂工樂器祭品祭器一切應用等項俟奉

旨舉行之日行各該部院衙門備辦如有未盡事宜

臣

部臨期另行請

旨可也康熙二十三年三月十二日題本月十五日奉
旨依議

禮部等衙門

題為請

旨事據太常寺呈稱該本寺等衙門題前事內開倣照
園丘大祀竝

幸學釋奠例祭祀應用樂器祭品器皿等物俱關營造

典禮臣寺應會同禮工二部議覆可也等因奉
旨依議欽此欽遵該臣等會議得

皇上鑒興巡歷行經泰岱照

園丘大祀禮燔柴祭

天應用樂器祭器等物若俱另行修造恐致糜費錢糧難
以猝辦且係一時舉行之禮應將

天壇見用樂器祭器酌量帶去應用內有物件難以運送
者應於該地方備造其可減省者酌量減去今

將應帶應造應減器物逐一明晰開列應造者
於該地方營造備辦其泰山之神原有祭告舊
例應用祭品祭器行文該撫照例備辦至闕里
孔子廟啓聖祠四配十哲兩廡現有祭祀器皿樂
器今應照康熙八年釋奠禮開寫數目行文衍
聖公備辦其祭

上帝位前祭

孔子廟祭品等物俱行文該撫備辦所有營造備

辦器皿等物候

命下舉行之日差臣部寺官各一員前往會同該撫動
支正項錢糧營造備辦可也等因康熙二十三
年五月十七日題本日奉

旨依議欽此欽遵到部該臣等會議得今應差禮部工
部太常寺官各一員工部筆帖式一員匠役頭目帶
領欽天監相度地方官員前往會同該撫於秦山下
閱選潔淨寬平致祭之處即行修理營造其該地方

應造器皿等物亦差禮部工部太常寺官各一員
筆帖式各一員會同該撫速行備造其祭祀

孔廟所用器皿樂器等物雖行文衍聖公將現有者
令其備辦但恐有悞應差太常寺官一員筆帖
式一員將祭祀應用器皿樂器等物查閱備齊
所有前往官員應照例騎驛馬前去可也康熙
二十三年九月初七日題本日奉

旨依議

禮部等衙門

題為欽奉

上諭事康熙二十三年九月初八日大學士勒德洪明

珠奉

上諭朕今東巡應行典禮着九卿詹事科道太常寺官員會議具奏欽此欽遵查得先經九卿詹事科道會議覆科臣王承祖條奏內稱

皇上巡問民俗經過泰山關里應倣行虞舜燔柴漢高

祀孔子禮致祭等因禮部議覆

皇上鑾輿巡歷所至之地諮詢吏治行經泰岱燔柴之禮自應詳備應如見行

園丘大祀禮參酌舉行

車駕經過闕里應照康熙八年

幸學釋奠禮參酌舉行等因具

題在案該臣等會議得虞舜東巡狩至于岱宗燔柴致祭漢高過魯以太牢祀孔子俱係巡歷所至

乘便致祭原非特行往祀今

皇上聖德神功同符堯舜做古之制爰事東巡

鑾輿經過泰山闕里亦應致祭泰山照祀五嶽禮致祭

孔廟照本處祀典致祭其前議備辦一切應用

等項俱應停止可也康熙二十三年九月初十

日題本月十三日奉

旨依議

附錄 唐虞五載一巡狩羣后四朝歲二月東

巡狩至于岱宗柴望秩于山川肆覲東后協時
月正日同律度量衡修五禮五玉三帛二生一
死贄五月南巡狩至南嶽八月西巡狩至西嶽
十一月朔巡狩至北嶽皆如岱宗之禮歸格于
藝祖用特夏后氏因之 周制十二年一巡狩
天子將巡狩類乎上帝宜乎社造乎禰職方氏
先戒四方諸侯曰各修平乃守考乃職事無敢
不敬戒國有大刑及王之所行先道帥其屬而

巡戒令大馭掌犯輶之禮土訓氏夾王車而行
以待王問九州形勢山川所宜誦訓氏亦夾王
車以上古久遠之事告王又掌道方慝以昭辟
忌以知地俗乘金輅建大旗歲二月東巡狩至
於岱宗柴而望祀山川覲諸侯其方之諸侯先
於境首待所過山川則使祝宗先以三等璋瓚
皆以黃金為鼻流酌鬱鬯以禮神次乃校人殺
黃駒以祭之每宿舍掌舍設桎桓再重其外則

土方氏又設藩籬既至方嶽先問百年就見之
若未滿百年八十九十者路經其門則見之不
然則否天子乃令太師採人歌謠賦詩以樂播
而陳之以觀人風俗以審其善惡命典祀納賈
陳百物之貴賤以觀人之所好惡又命典禮之
官考校四時節氣月之晦朔甲乙等日及候氣
之律呂所用禮樂宮室車旗等制度君臣上下
衣服皆以王者所頒制度考校之諸侯封內有

名山大川不舉而祭之者為不敬不敬者君削其地有祭宗廟不順昭穆者為不孝不孝者君絀以爵變禮易樂者為不從不從者君流革制度衣服者為畔畔者君討有功德於人者加地進律其諸侯待王之牢禮以一犢既黜陟諸侯乃與之相見於方嶽之下築壇與覲禮壇制同諸侯既朝見王訖乃退其餘五月南巡狩至於南嶽如東巡狩之禮八月西巡狩至於西嶽如

南巡狩之禮十有一月北巡狩至於北嶽如西
巡狩之禮巡狩訖却歸每廟用一牛以告至

以

上巡狩

漢高帝十二年十一月行至淮南還

過魯以太牢祀孔子 光武建武五年冬十月

征董憲遂幸魯使大司空祀孔子中元元年正

月丁卯東巡二月己卯幸魯進幸泰山 明帝

永平十五年二月庚子東巡耕於下邳至魯幸

孔子宅祀仲尼及七十二弟子 章帝元和二

年正月丙辰東巡狩耕於定陶柴告岱山祀明
堂三月己丑進幸魯庚寅祀孔子於闕里及七
十二弟子 安帝延光三年二月丙子東巡狩
辛卯幸泰山柴告岱宗壬辰宗祀五帝於汶上
明堂癸巳告祀二祖六宗戊戌祀孔子於闕里
北魏世祖太平真君十一年車駕南伐宋自
東平趨鄒山十一月進至魯郡以太牢祀孔子
孝文帝泰和十九年夏四月如魯城親祀孔

子唐高宗乾封元年正月丙戌車駕發泰山
辛卯至曲阜贈孔子太師以少牢致祭明皇
開元十二年十一月封泰山還車駕詣孔子宅
親設奠祭後周太祖廣順二年親征慕容彥
超兗城將破夜夢一人狀甚魁異被王者服謂
太祖曰明日當得城及覺因躬率將士力攻至
午城陷車駕既入過夫子廟帝豁然曰昨夢殆
夫子乎不然何路與廟會因駐蹕升堂瞻像一

如夢中感喜下拜遂於六月朔親詣闕里致祭
宋真宗大中祥符元年十一月勅告報皇帝
封禪畢車駕至兗州曲阜縣謁先聖廟取十一
月初一日備禮躬謁 金天會七年睿宗為都
元帥統大軍入兗州撫定退師命曲阜知縣衡
雄引詣宣聖廟時值建炎寇氛殿火猶未息元
帥乃登杏壇奠拜訖復詣聖林 熙宗皇統元
年二月戊午親詣闕里致祭 以上祀孔子廟

臣按巡狩之禮唐虞三代之六藝之文可考
信也蓋聖人繼天立極臨御萬方當其垂拱九
重既已明目達聰疇咨交儆百揆時敘咸熙庶
績以覆斯民於樂利之天而躋一世於仁壽之
域矣然猶慮四海之廣五服之遙或有德意弗
克下究民隱壅於上聞者所以舜典期於再閏
周官更以星終時邁方嶽言巡所守於以聽採
輿誦觀風察俗宣布德澤加惠元元凡以為民

事而已而必至於四嶽者蓋一方之諸侯各聚於方嶽之下以觀天子詩所謂哀時之對是也後世方士迺有七十二君封禪之說諸儒又緣飾以書之柴而望秩詩之陟其高山以緯解經承譌襲謬二千年來莫有起而正之者

皇上建中祇德時敏緝熙如天之仁雨露庶物文教以紀之聲靈以震之靈臺偃伯三方底定奉琛輸賁重譯來賓老稚謳歌閭閻清晏莫戩哉三五之

隆無以過也而迺勤恤民隱惟恐一夫之不獲
特於農隙展時巡之典布德行慶悲準聖經唯
以敬

天之實心行動民之實政至於封禪不經之說祠官聚訟
之議數千年相沿之陋習得我

皇上直斥其非以解萬世之大惑而復覩唐虞三代之
盛典焉

大聖人之宸斷豈不偉哉

臣又按開元禮有皇帝巡狩儀其目有鑾駕出
宮燔柴告至鑾駕還行宮望秩山川肆覲東后
考制度六條又有皇帝封祀泰山儀有鑾駕進
發齋戒制度陳設省牲器鑾駕上山薦玉幣山
下封祀壇進熟燔燎封玉冊鑾駕還行宮朝覲
羣后考制度十四條蓋巡狩封祀判為二事其
治道起壇攻石刻玉皆特遣將作勞費吏民良
以縟節滋於汰心彌文徇乎曲說異於古者從

簡尚質之義矣我

皇上鑒古制惜民力足以告虔無取乎侈足以成禮勿
務乎華一切儀器毋有營作且減輿衛免供億
戒倣擾國不加費民不知勞不踰時

鑾輿巡歷布德行慶徧於直隸山東江南矣凡我臣民
何其多幸歟

秋九月

皇帝稽古東巡十九日壬午昧爽

發德音肆赦天下

詔曰帝王誕膺景命統御萬邦道重觀民政先求瘼是以虞廷肆覲肇舉省方周室懷柔式歌時邁詩書具在典制丕昭朕仰荷

天庥繼承

祖烈撫茲兆庶期底時雍夙夜孜孜懋求治理以富以教靡敢怠遑猶慮鄙屋艱難罔由上達故於直隸郡縣周覽巡行勤施補助更念山左等處土宜俗尚不加

循省曷克真知矧厯逢甲子世際昇平聿圖泰運之
恒新在措芸生於豫大乘時命駕咨彼民依但樂利
祇慰夫一方而德澤未敷於九有朕心歎焉用是特
昭公普以弘仁庶奏誠和之盛治一江南浙江江西
湖廣省分自用兵以來供應繁苦宜加恩卹康熙二
十四年所運漕糧著免三分之一一自康熙十三年
起至二十二年拖欠漕項錢糧著自康熙二十三年
起每年帶徵一年以免小民一時竝徵之累一東巡

經過地方宜俱加恩卹著將康熙二十四年應徵丁銀盡行蠲免一泰山經過致祭其四嶽四瀆等祀應遣官致祭察例舉行一凡官吏兵民人等有犯除謀反叛逆子孫殺祖父母父母內亂妻妾殺夫奴婢殺家長殺一家非死罪三人採生折割人謀殺故殺蠱毒魘魅毒藥殺人強盜妖言十惡等真正死罪不赦外其謀反謀叛犯人妻妾子女家產應入官及父母祖孫兄弟應流徙及脩造宮殿陵寢冒破錢糧工程

不固脩築河工不行堅固失陷城池行間獲罪官吏
衙役枉法受贓監守自盜叛逆財產人口侵蝕入已
誣告叛謀發掘墳塚略賣人口及光棍亦俱不赦外
其餘自康熙二十三年九月二十四日昧爽以前死
罪軍罪以下已發覺未發覺已結正未結正咸赦除
之有以赦前事告訐者以其罪罪之一直隸各省脩
理文廟銀兩照舊存留以供整葺一直隸各省解費
腳價銀兩仍復存留照額支給一祭祀行香習儀及

祈晴祈雨鄉飲酒禮等項銀兩仍復存留以供支用
一嶽鎮四瀆廟宇傾頽者該地方官設法脩葺以昭
誠敬一内外文武官員現應議處者俱著寬免一内
外文武大小各官除各以現在品級已得封贈外凡
授職陞級及改任者著照新銜封贈一各處孤貧口
糧已復存留經管地方務須從實給散以贍窮獨於
戲時臻熙皞彌隆寬卹之恩戶樂清寧丕篤綿長之
慶布告天下咸使聞知

附錄 漢元和二年東巡詔曰朕巡狩岱宗柴

望山川告祀明堂以章先勲其二王之後先師
之裔東后蕃衛伯父伯兄仲叔季弟幼子童孫
百僚從臣宗室衆子要荒遠服沙漠之北蔥嶺
之西冒彫之類跋涉懸度陵踐阻絕駿奔郊時
咸來助祭祖宗功德延及朕躬予一人空虛多
疚纂承尊明盥洗享薦慙愧祇慄詩不云乎君
子如社亂庶遄已歷數既從靈耀著明亦欲士

大夫同心自新其大赦天下諸犯罪不當得赦者皆除之復博奉高羸無出今年田租芻橐

又告東平王手詔曰朕惟巡狩之制以宣聲教考同遐邇解釋怨結也今四國無政不用其良駕言出遊欲親知其劇易前祀園陵遂望祀華霍東柴岱宗為人祈福今將禮常山遂徂北土歷魏郡經平原升踐隄防詢訪耆老咸曰往者汴門未作深者成淵淺則泥塗追惟先帝動天

之德底績遠圖復禹弘業聖績滂流至於海表
不克堂構朕甚慙焉月令孟春善相邱陵土地
所宜肥田尚多未有墾闢其悉以賦貧民給與
糧種務盡力農勿令遊手所過縣邑聽半入今
年田租以勸民夫之勞 唐高宗幸曲阜祠廟
詔曰朕聞德契機神盛烈光於後代化成天地
元功被於庶物魯大司寇宣尼父孔某資大成
之材屬衰周之末思欲屈已濟俗弘道佐時歷

聘周流莫能見用想乘桴以永歎因獲麟而興
感於是垂素王之雅則正魯史之繁文播鴻業
於一時昭景化於千祀朕嗣膺寶歷祇奉睿圖
憲章前王規矩先聖崇至公於海內行大道於
天下遂得八表乂安兩儀交泰功成化洽禮備
樂和展采東巡回輿西上途經茲境撫事興懷
駐蹕荒區願為師友瞻望幽墓思承格言雖宴
寢荒蕪餘基尚在靈廟空寂徽烈猶存孟軻曰

自生民以來未有孔子者也微禹之歎既深褒
崇之道宜峻可追贈太師庶年代雖遠式範令
圖景業維新儀刑茂實其廟宇制度卑陋非宜
更加脩造仍令三品一人以少牢致祭褒聖侯
德倫既承胤嗣有異常流其子孫竝免賦役

宋真宗幸闕里詔曰朕以紀號岱宗觀風廣魯
久懷先聖實主斯文矧尼山毓秀之區光靈可
挹而曲阜奉祀之地廟貌猶存將伸款謁之儀

卷二
用表欽崇之志宜取十一月朔日幸曲阜縣備
禮躬謁仍付所司詳定車駕至曲阜縣謁文宣
王廟內外量設黃麾仗襲文宣公親伯叔兄弟
竝許陪位

臣按古者天子所至稱幸謂必有恩澤及於臣
民也然或於乘輿所駐賜復宥省或因巡行所
過得免田租傳諸史冊輒稱盛舉未有巡行一
方而普天率土竝得邀浩蕩之恩者也我

皇上乘上元泰運肇舉東巡而覃敷

德音徧及於溥海內外若減免四省之現漕帶徵十年
之漕欠全蠲所過之正供恤民力也舉嶽瀆之
祀典飭祠廟之修葺答神貺也赦罪重民命也
復修理丈廟及祭祀行香鄉飲各項之公費重
文教也給解費蘇民困也寬吏議惜人材也推
封典廣孝治也卹孤貧惠癯獨也仁至而義盡
博施而濟衆教養兼資神人胥悅如春風之無

不被焉如甘雨之無不潤焉如日月之無不照
焉誠所謂樂以天下澤及萬方者也又寧獨一
人之稱幸已耶臣等遭逢

聖明沐浴

膏澤唯有懼忤踴躍於

堯天舜日之下而已矣

幸魯盛典卷二

欽定四庫全書

幸魯盛典卷三

九月二十四日丁亥

聖駕發自京師衍聖公孔毓圻率五經博士孔毓埏等

迎

駕至齊河恭請

聖安畢

上問衍聖公孔毓圻曲阜有何古蹟毓圻悉數奏聞

上諭衍聖公孔毓圻歸待於境毓圻等遵

旨辭歸

遣太常寺丞張量馨鴻臚寺鳴贊鉛布齋香帛至闕

里飭執事有司演習禮樂并攜國學所用樂舞

袍服以往十月初七日己亥張量馨等至闕里

先是禮部等衙門

題為請

旨事先經禮部等衙門題前事內稱九卿詹事科道太

常寺官員會議具題

皇上東巡

鑾輿經過泰山關里致祭泰山照祀五嶽禮致祭孔廟
照本處祀典致祭等語查康熙八年

皇上幸學致祭前一日在

宮內齋戒親王以下多羅貝勒以上部院侍郎品級
官員以上武官都統精奇尼哈番以上漢文官
三品以上武官二品以上翰林院七品以上俱

在本家齋戒一日其不陪祀固山貝子以下滿洲蒙古漢軍漢人文武各官皆穿朝服於

皇上往來俱跪候過

皇上朝服出宮鹵簿大駕俱行陳設迎神送神俱行兩

跪六叩頭禮四配十哲兩廡啟聖祠俱

遣官分獻孔子啟聖公俱未用祝文該臣等會議得今

皇上東巡經過闕里

皇上敬祀

先師應於致祭前一日於

行宮齋戒穿補服帶數珠行禮所帶

行在儀仗俱應陳設迎神送神俱行兩跪六叩頭禮

今

聖駕親詣闕里致祭尊師重道有關

盛典應用祝文讀祝文畢於跪處行三叩頭禮其配

位十哲兩廡啟聖祠應

遣官分獻

扈從內大臣侍衛文武三品以上官員該地方現在
彼處所有文官知府以上武官副將以上及衍
聖公五氏現有官職者俱齋戒一日陪祀其不
齋戒文武各官并現在彼處地方官員於
聖駕往來俱穿補服帶數珠在

行宮前兩傍列跪候過

皇上親詣

孔廟致祭闕係

大典若用本處之樂與典禮不符相應停用本處樂

器祭畢候

皇上還

行宮令衍聖公竝五氏現有職官品級者謝

恩俟

命下之日孔子啟聖公祝文由翰林院撰擬可也奉

旨着會同內閣議奏欽此該

臣等會議得

皇上東巡經過闕里致祭

孔廟

皇上行禮陳設儀仗迎神送神俱行兩跪六叩頭禮用
祝文讀祝文畢就於跪處行三叩頭禮

遣官分獻內外大小官員陪祀列跪候過停用本處樂
器衍聖公五氏現有官職品級者謝

恩祝文交翰林院撰擬等因俱照禮部等衙門所議既
係巡歷之所

皇上前一日不必齋戒於所到次日致祭可也康熙二

十三年九月二十四日題本日奉

旨尊禮

先師應行三跪九叩頭禮亦應用樂著察例詳議具
奏欽此該臣等會同再議查漢高帝光武幸闕里致
祭禮儀史冊未經開載漢章帝宋真宗幸闕里
致祭禮俱再拜今

皇上聖學高深神功炳奕闡百王之道統紹千聖之心
傳尊禮師儒懋昭文治規模邁於前代憲章垂

卷三
於來茲

大禮攸關特加隆重

皇上經過闕里致祭

先師迎神送神俱行三跪九叩頭禮其彼處所用樂章雖與國學所用樂章稍有不同亦皆尊崇師道之詞應仍用彼處樂章但彼處樂工未諳禮儀由太常寺量派官員人役騎驛馬前往闕里指示至彼處樂工袍服恐陳舊不堪應用將太

學所用樂工袍服帶往暫用餘俱照前議可也

康熙二十三年九月二十六日題本日奉

旨依議

謹錄

世祖章皇帝順治九年九月二十二日頒定

幸太學儀注

皇上前一日在

宮齋戒一日和碩親王以下多羅貝勒等以上在部

院衙門滿洲蒙古漢軍侍郎等官以上及武官
都統精奇尼哈番以上漢文官三品以上武官
二品以上及內院翰林官七品以上各在家齋
戒一日工部先期將

皇上御幄設於文廟大成門東傍南向設立

皇上御椅一張彝倫堂內正中設黃

御幄設

皇上御椅鴻臚寺官設經書黃案一張於堂內傍設講

書案二張兩傍相向安設國子監祭酒將所講經書於本日設於桌上是日早和碩親王以下公等以上穿朝服於午門內齊集滿洲蒙古漢軍漢文武齋戒各官先赴文廟丹墀下兩傍相向排立其不赴祀王等以下文武各官俱穿朝服在午門外齊集畢禮部官奏請

皇上出

皇上具禮服陞輦各樣鹵簿大駕全設出時午門鳴鐘

齋戒王等以下公等以上在內金水橋兩傍排
立候過隨行去在午門外齊集衆皆跪候

駕過

皇上至文廟東成賢街國子監滿漢祭酒司業率諸監

生於成賢街左邊跪候過

皇上至櫺星門在門外降輦由中門至大成門入

御幄少息由大成門中入進時先入排班官員立候

駕過

皇上陞中階進廟詣

孔夫子位殿內正中立王貝勒等八兩傍門升東西
階殿外臺上排立各官在臺下排立引禮官引
皇上行二次跪六次叩頭諸王貝勒等併陪祀釋奠行
禮各官亦二次跪六次叩頭作樂供帛官跪在

皇上右傍獻帛

皇上接立望上鞠遞與供官供官跪接起供於位前畢

供酒官在

皇上海傍跪獻酒

皇上接立望上鞠亦遞與供官供官跪接起獻於位前

畢送神

皇上行二次跪六次叩頭各官俱二次跪六次叩頭畢
駕出進幄少歇坐諸王貝勒出大成門外候

皇上詣講書彝倫堂釋奠行禮各官行聖公五經博士

祭酒司業教官監生先赴太學門內階下兩傍

排立禮部官奏請

詣講書彝倫堂

皇上換具常服在櫺星門外陞輦來時王貝勒等隨至
彝倫堂太學門將入兩傍排班文武各官衍聖
公祭酒司業學官諸監生俱跪候過

皇上陞彝倫堂陞坐諸王貝勒等在堂內各官在堂外
臺下兩傍排立聽鴻臚寺贊禮官贊衍聖公祭
酒司業學官五經博士五氏子孫及諸監生在
臺下三跪九叩頭立

皇上諭坐諸王等叩頭坐文武各官都統大學士尚書
精奇尼哈番以上及衍聖公俱分翼入彝倫堂
叩頭坐侍郎等官在彝倫堂外臺上叩頭坐祭
酒司業官監生仍於原處立鴻臚寺鳴贊贊講
經滿漢祭酒從東邊門入滿漢司業從西邊門
入俱北面立鳴贊贊起案執事官將東傍經書
案擡至正中黃幄門前安置

皇上諭講書官坐滿漢祭酒在東邊案前滿漢司業在

西邊案前各就案叩頭坐滿漢祭酒講易經滿漢司業講書經四品以下內院官執事官五經博士學官諸監生俱在行禮處排立聽講講畢鳴贊贊起案執事官二員舉經案於原處安置祭酒司業俱出於原班排立處立禮部一官入於彝倫堂內東傍西向跪奏請傳

旨鳴贊贊跪祭酒司業學官率諸監生跪禮部一官在
中外簷下東傍西向立宣

諭旨宣畢聽鳴贊贊祭酒司業諸監生就跪三次叩頭
二次跪六次叩頭贊退出兩傍門成賢街在西

大路排立

皇上飲茶

賜諸王等以下各官俱飲茶畢禮部官跪奏禮畢

皇上陞輦出國子監門來時作樂在成賢街大路排立

祭酒司業學官諸監生跪候

駕過其不赴陪祭各官仍在午門外跪候

駕過諸王貝勒等隨至候

皇上還

宮衆皆退次日行進表禮是日早鹵簿大駕全設衍
聖公祭酒奏表照常置於黃案上和碩親王以
下輔國公以上穿朝服於常朝處齊集民公侯
伯以下滿洲蒙古漢軍有頂帶官以上各監生
等俱穿朝服於常朝處齊集禮部官奏

皇上具禮服出

宮陞

武英殿坐位內大臣下內院禮部都察院鴻臚寺官
先不贊行三跪九叩頭禮續聽鳴贊贊和碩親
王以下文武各官行三跪九叩頭禮叩頭畢王
等以下公等以上各歸原班立衆官亦歸旗下
處立續聽鳴贊贊衍聖公祭酒司業學官五經
博士五氏子孫諸監生等俱排班跪鳴贊贊奏
表宣表官將衍聖公奏表從案捧於

殿簷下門外東邊西向跪宣續宣祭酒奏表宣畢鳴
贊贊叩頭衍聖公祭酒司業學官五經博士五
氏子孫諸監生等跪三叩頭再聽鳴贊贊二次
跪行六次叩頭禮王等以下衆皆各照坐處坐
飲茶畢

皇上還

宮衆皆退本日

賜衍聖公博士族人及執事內院禮部太常寺光祿寺

鴻臚寺國子監等官宴於禮部

命內大臣輔國公三院大學士六部尚書左右侍郎九卿科道都察院等官待次日午門前頒

賜

皇上龍飛康熙八年四月十五日

幸太學照順治九年儀注

附錄 漢章帝元和二年東狩過魯祀孔子及七十二賢作六代之樂帝時升廟西面立羣臣

中庭北面皆再拜帝進爵而後坐 後周太祖
廣順二年至兗州入夫子廟再拜近臣或謂天
子不當拜異代陪臣帝曰夫子聖人也百王取
則安得不拜因幸闕里復再拜及幸孔林又再
拜 宋真宗大中祥符元年東封禮畢如曲阜
謁先聖廟帝具靴袍行酌獻禮有司定儀止肅
揖帝特再拜以申崇奉之意 仁宗天聖二年
慶厯四年兩幸國子監謁孔子有司言舊儀肅

揖而帝特再拜 哲宗元祐元年幸國子監行
釋奠禮一獻再拜 金熙宗皇統元年帝謁廟
奠祭北面再拜顧儒臣曰為善不可不勉孔子
雖無位以其道可尊使萬世高仰如此 章宗

明昌四年八月丙午諭旨宣徽院曰明日親釋
奠有司議肅揖朕以宣聖萬世帝王師恐汝等
未喻可備拜裊朕將拜焉丁未上謁北面再拜
明太祖洪武十四年脩太學成十五年五月

十一日記先師以太牢十七日上躬詣廟禮行
酌獻再拜而退 成祖永樂四年三月將幸太
學命禮部詳議禮儀尚書鄭賜言宋制謁孔子
服靴袍再拜成祖曰見先師禮不可簡必服皮
弁行四拜禮 以上拜禮

漢章帝幸闕里作六

代之樂奏黃鐘歌大呂舞雲門奏太簇歌應鐘
舞咸池奏姑洗歌南呂舞大韶奏蕤賓歌函鐘
舞大夏奏蕤則歌小呂舞大濩奏無射歌夾鐘

舞大武 宋文帝元嘉二十二年皇太子釋奠

舞六佾設軒縣之樂從裴松議也 齊武帝永

明三年正月詔立學設軒縣之樂六佾之舞牲

牢器用悉依上公從范宣議也 北齊天保元

年制春秋二仲釋奠用軒縣舞六佾 隋文帝

贈孔子為先師尼父制國子寺每歲以四仲月

上丁釋奠州縣學以春秋仲月釋奠樂奏咸夏

唐太宗貞觀二年升孔子為先聖以顏子配

備千戚俎豆之容 高宗顯慶三年詔孔子廟
用宣和之舞國子博士范頤撰樂章 明皇開
元二十二年撰釋奠樂用姑洗之均三成 二
十七年封孔子為文宣王被王者袞冕二京之
祭特用太牢樂用宮縣舞八佾頒四廂金石二
十四架 代宗永泰二年脩國學祠堂成行釋
奠禮奏宮縣於祠堂 宋太祖建隆二年有司
請改樂章竇儼上一十二樂曲文宣王廟用永

安之曲 仁宗景祐元年詔釋奠用登歌 徽

宗大觀三年更撰釋奠樂章 四年大晟府擬

撰釋奠十四章衍聖公孔端友奏朝廷稽考三

代制禮作樂乞頒降大晟新樂許內族人及縣

學生咸使肄習并乞降禮器以備釋奠及家祭

使用乃遣孔子四十七代宣教郎若谷押賜堂

上正聲大樂一副禮器一副壘一洗一勺金帨

巾二篚全尊壺二龍勺幕各全毛血盤一象尊

一犧尊一簋簋并蓋登瓦并蓋箱篚并竹各一
鉶鼎三并蓋杓三邊十纂全豆十篚全胙桮八
爵三玷全已上禮器也祝一椎全敔一簋全編
鐘編磬各一架栒虞崇牙流蘇等各全搏拊鼓
塤箎笛簫巢笙和笙一絃至九絃琴瑟二已上
大樂也天下節鎮州縣學皆賜堂上樂一副正
聲樂曲十二章春秋上丁釋奠則學生登歌作
樂 金世宗大定十四年正月國子監言春秋

仲月上丁釋奠於文宣王兗國公鄒國公每位
遵豆各十犧尊一象尊一簋簋各二俎二祀版
各一皆設案七十二賢二十一先儒每位各遵
一豆一爵一兩廡各設象尊二禮行三獻樂用
登歌 章宗明昌四年八月上親釋奠初議不
用牲牢既而禮官云遵豆脯醢之數既係中祀
若止用二遵二豆似太疎簡禮體未備擬全用
十遵十豆於是備數 五年六月禮官議曲阜

夫子廟脩蓋已畢自來祭享行三獻禮其獻官
衍聖公止用公服親族二人各用儒服及別無
音樂即用國學釋奠依古禮用法服及登歌雅
樂宋政和間曾賜本廟三獻官祭服及登歌之
樂令族人及學生閱習今尊崇聖道度越前昔
而三獻止用常服及無雅樂恐未相稱六年四
月乃勅賜衍聖公以下三獻法服仍給登歌一
部 元太宗九年衍聖公孔元措奏燕京南京

等處尚有太常禮樂官及樂工人等乞行拘刷
奉詔若有前項人等及家屬用舖馬頭口起移
赴東平府地方住坐分付孔元措收管令本路
課稅所量給日糧養濟就於本廟閱習聽候朝
廷不測用度并自來有底辭章樂器鐘磬等物
盡行拘刷見數申奏 成宗大德十年命江浙
行省製宣聖廟樂秋八月用於廟祀其歌樂仍
宋之舊元史有新撰樂章因循未用 武宗至

大三年冬十月置曲阜宣聖廟登歌樂 明太
祖洪武四年更定釋奠孔子祭器禮物先是孔
子之祀像巍然高坐而禮器陳於坐下弗稱其
儀改為高案其籩豆簠簋悉以磁代牲用熟樂
舞生擇監生及文武大臣子弟在學者預教習
之 洪武七年十一月奉旨造送宣聖廟樂器
祭器法服各給一副四時祭祀合用樂舞生於
府州縣儒學生員內選或於民間俊秀子弟內

選用備行準取到濟寧曲阜等州縣樂舞生張
濤陳慶等一百二十餘名內將二十名起送太
常寺協律郎處習演樂舞熟嫻欽賜寶鈔發回
在廟應充前役俱照廩膳生員例除本身優免
仍免本人戶二丁 洪武十年奉旨孔氏廟樂
舞生衣冠官府做與他并做籥翟應鼓等項

洪武二十六年詔定文廟祭祀設高案頒大成
樂器於天下令如式製造其制楹鼓一執事一

人編鐘一執事八人編磬一執事八人壎二簫
二執事共四人鳳簫二執事二人笛笙簫各執
事六人琴六瑟二執事共八人歌六人搏拊二
祝一敔一麾一共五人舞三十六人 憲宗成
化十三年祭酒周洪謨言孔子稱大成至聖文
宣王冕十二旒袞十二章既服天子之衣冠當
用天子之禮樂擬合加十籩豆為十二籩豆六
佾為八佾乃增國學之祭為八佾十二籩豆郡

縣用六佾八籩八豆遣翰林學士王獻詣闕里
祭告又添樂舞生八十名 孝宗弘治元年三
月帝將幸學釋奠太子太保禮部尚書王恕言
儀注分獻官始終不拜非禮臣以為分獻官拜
位當在殿陛之下列於陪祭官之前迎神送神
上拜於殿陛分獻陪祭官拜於殿階似為近禮
臣讀禮記有曰凡學春官釋奠於其先師秋冬
亦如之此言主於行禮非報功也故無幣又曰

凡始立學者必釋奠於先師先聖及行事必以幣此言立學事重故釋奠必以幣今皇上初幸太學卽所謂始立學也臣以為釋奠當用幣爵亦當三獻今儀注內無獻幣之禮似為未安奉旨分獻官拜禮準行餘照舊恕復疏請乃令廷臣會議欲行奠帛三獻之禮須讀祝飲福受胙始為全備難以更改請於聖駕幸學之前致齋一日至期加帛一段餘仍其舊奉旨尊先師當

以禮只孔子前加幣用太牢改分獻為分奠其餘俱照舊例行 世宗嘉靖元年幸學謁先師廟至櫺星門外即降輦步入禮畢仍步出櫺星門外升輦 嘉靖九年從大學士張璁議釐正祀典改大成至聖文宣王曰至聖先師盡去封爵減國學十二籩豆為十籩豆天下府州縣八籩豆樂舞止用六佾

以上禮樂

世祖章皇帝順治九年

幸太學

孔子廟樂章仍舊制至順治十三年

欽頒國子監丈廟大成歌章皆用黃鐘宮迎神咸平之
曲無舞其辭曰大哉至聖峻德弘功敷文元化
百王是宗典則有常昭茲辟廡有虔簠簋有嚴
鼓鐘奠帛初獻寧平之曲有舞其辭曰覺我生
民陶鑄前聖巍巍泰山實予景行禮備樂和豆
籩惟靜既述六經爰斟三正亞獻安平之曲有

舞其辭曰至哉聖師天授明德木鐸萬年式是
羣辟清酒惟醕言觀秉翟太和常流英材斯植
終獻景平之曲有舞其辭曰猗與素王示予物
軌瞻之在前神其寧止酌彼金罍惟清且旨登
獻惟終弗遐有喜徹饌咸平之曲無舞其辭曰
璧水淵淵崇牙業業既歆先聖亦儀十哲金聲
玉振告茲將徹馥假有成羹牆靡愒送神咸平
之曲無舞其辭曰煌煌學宮四方來崇甄陶胄

子暨予微躬思皇多士敷奏厥功佐予永清三

聖是隆

以上樂章

臣按釋奠之禮見於周官戴記注疏家大抵皆言設薦饌奠酌而已無食飲酬酢之事而鄭康成以王制之釋奠為釋菜奠幣以文王世子之釋奠者必有合為與鄰國合祭孔穎達以學記之釋菜為釋奠其說相混齊尚書令王儉言釋菜禮廢金石俎豆皆無明文而車陸二范議亦

互異歐陽脩作穀城夫子廟記直謂釋奠釋菜
皆禮之畧釋奠有樂而釋菜無樂陳暘樂書則
謂學校禮樂之所自出小有釋菜而以食為主
大有釋奠而以飲為主其習舞與聲而大合六
代之樂一也暘之兄祥道作禮書考據諸經言
之最詳以為古者釋奠或施於山川廟社或施
於學周官大祝大會同造於廟宜於社過大山
川則用事焉反行舍奠甸祝舍奠於祖廟禰亦

如之此施於山川廟社者也禮記文王世子凡
學春官釋奠於先師秋冬亦如之凡始立學者
必釋奠於先聖先師及行事必以幣凡釋奠必
有合也天子視學大昕鼓徵乃命有司行事興
秩節祭先聖先師焉有司卒事返命適東序釋
奠於先老王制出征執有罪返釋奠於學以訊
馘告此施於學者也賈公彥曰非時而祭曰奠
此為山川廟社而言之也學之釋奠則有常時

者四時之釋奠也有非時者始立學天子視學
師還獻馘之釋奠也釋奠有牲幣有合樂有獻
酬會同出征返而釋奠告祭也曾子問凡告必
用牲幣文王世子凡始立學釋奠行事必以幣
此有牲幣之証也文王世子凡釋奠必有合也
此有合樂之証也聘禮行釋幣返釋奠席於阼
薦脯醢三獻此有獻酬之証也非時之祭釋奠
於先聖先師四時則先師而已此二陳之說也

然則祭先聖為重故禮加詳而必有幣祭先師
為輕故禮稍畧而不必有幣審矣而古之所稱
先聖先師者亦不一其人周有天下立四代之
學虞庠則以舜夏學則以禹殷學則以湯東膠
則以文王自魯哀公十七年立孔子廟於故宅
解經者即所見聞云先聖周公若孔子唐顯慶
二年長孫無忌之議云漢魏以來取捨各異顏
回夫子互作先師宣父周公迭為先聖求其節

文遞有得失所以貞觀之末親降綸音正夫子
為先聖加衆儒為先師其周公仍依別禮配享
武王蓋自是始罷竝祀而專祠夫子其後配哲
賢儒以次侑享而先聖先師咸定於一尊矣然
而古之釋奠常時則所教之官為祭主非時則
有司行事而已未聞以天子而親祭也漢高過
魯太牢躬祭可謂卓然獨見為萬世作則而大
合六代之樂惟一舉於章帝之時論者蓋惜其

當時之臣未能以古時釋奠之禮而推廣之且亦惜其不定著為律令致使古樂自此而絕響也魏之正始釋奠始行於辟雍率太常行事厥後間有親承而禮殊隆殺樂異盈減歷數幸魯十數君屈尊申敬則有之矣亦未知考信於古而釐定夫釋奠之禮也宋真宗天禧元年嘗詔崇文館雕印釋奠儀注及祭器圖頒行天下諸路而其書不傳無從考質明臣王恕亦曾上疏

請行奠帛三獻之禮須讀祝飲福受胙禮始為
備而議弗盡行僅詔加幣而已我

朝臨雍典例迎神送神俱二次跪六次叩頭尊師重
道已至於無可加乃我

皇上幸曲阜一準臨雍儀注復

親定行三次跪九次叩頭禮而釋奠之禮於斯為極盛
仰見我

皇上至聖至神與天同體與聖合一故尊之如此其至

行之如此其決非祠官之故事曲臺之舊文所
可同年而語矣若乃樂懸舞列闕里相沿與太
學小殊茲經曠典所司恐有紕繆議停本處樂
器

皇上特遣太常赴闕里廟庭指導肄習者四十餘日然
後擊拊俯仰秩然倫次五色成文八風從律此
則古者合聲習舞之遺義

皇上所以脩明先王之教於千百年廢墜之餘者豈復

前代之所得而及也哉

幸魯盛典卷三